

2.02

em. 85 m 11

Q. D. B. V.
DISSERTATIO JURIDICA
DE

041541
**NOTE FILIA
LOCUPLETIS,**

QUAM
IN

REGIA FRIDERICIANA
PRÆSIDE


CAR. GOTTLIEB KNORRIO

JURIVM DOCTORE EORVNDENQVE PROF. PVBL.
EXTRAORD.


Placido eruditorum examini submittit

JOANNES VICTOR BANDAV,

MICRO-OSCANIENSIS MAGDEBVRGICVS.

D. DECEMB. cl. 1824.
H. L. Q. S.

HALÆ MAGDEBVRGICÆ,
Typis IOH. CHRISTIANI HILLIGERI, Acad. Typogr.



V I R O
 ILLVSTRI, EXCELLENTISSIMO
 ATQVE GÉNEROSISSIMO
 D O M I N O
 IO. CHRISTIANO
 A
 DURFELD,

S. REGIAE MAI. A CONSILIIS IVST
 TIAE SANCTIORIBVS, REGIMINIS ATQVE
 SACRI TRIBVNALIS QVOD EST IN DVCATV
 MAGDEBVRGICO,
 CETERA.

MENSARVM PROVINCIALIVM IN ACADEMIA
 FRIDERICIANA
 DIRECTORI LONGE GRAVISSIMO,

DOMINO ET PATRONO
 SVO GRATIOSISSIMO
 FELICITATEM!

V I R

ILLVSTRIS, EXCELLEN-
TISSIME ATQVE GE-
NEROSISSIME,

VEreor equidem, ne reprehensionem
incurram, DOMINE, quod has TIBI
studiorum primitias consecrauerim,
cum ingenio TVO atque NOMINIS magnitudi-
ne eas esse indignas satis cognitum habeam at-
que perspectum. Sed veniam mihi promittit
certissimam, mirifica tua benignitas, qua omnes,
qui

qui vacant litterarum studiis, complecti
ad maiora incitare soles. Accipe igitur ea-
dem hac benevolentiae atque fauoris significa-
tione, **ILLVSTRIS DOMINE**, tenue hoc
opulculum, deuoti animi mei documentum.
Ego certe in secundis rebus meis numerabo,
si **TIBI, PATRONORVM MAXIME**, meos
probari conatus intelligam. Solent Viri,
qui in publica statione reipublicae gerendae
sunt constituti tot fessi laboribus, saepius dele-
ctari musarum otiiis; & ego sane noui nemi-
nem, qui maiorem quam **TV, MÆCENAS**,
inter ipsos quoque concatenatos labores, quos
REGIS TVI CLEMENTISSIMI iussu su-
scipis, ex iis capiat delectationem. Imo ni-
hil **TIBI** magis curae cordique est, quam,
vt non solum indefesso studio Patriae saluti,
pro splendidissimi muneris ratione, cui **TE**
admoit **REX POTENTISSIMVS**, invigi-
les; sed etiam musarum commoda, in qua-
rum solatium natus videris, quam maxime
promoueas. **Haberem proinde omnino,**
quare

laudes, quas **TIBI** admetiuntur boni omnes, excurrerem; sed prohibet id singularis **TVA** modestia, quæ inter egregias virtutes, quibus **TE** ornauit **NVMEN** providentissimum, conspicitur maxima. Interim tamen **DEVM O. M.**, a cuius sapientissimo nutu dependent vniuersa, ardentissimis venerari precibus nunquam desinam, ut **TVAM** incolumitatem inconcussam stare, **TE** que his rebus quam diutissime interesse iubeat! Vale & faue

**ILLVSTRIS, EXCELLENTISSIMI
ATQVE GENEROSISSIMI
NOMINIS TUI**

Cultori deuotissimo,

*Hale Magdeb.
d. XIX. Decembr. 1714.*

IO, VICTORI BANDAV.



DISSERTATIO IVRIDICA
DE
DOTE FILIAE LOCUPLETIS.

CAP. I.
AN IVRE ROMANO SIT DOTANDA FILIA LOCUPLES?

§. I.



Rodunt antiquitatum monumenta, omnium fere gentium moribus institutisque fuisse receptum, ut filii soli manerent in domo patris, heredes nominis omniumque quæ is reliquisset bonorum. Filix vero si nupsissent, cum dote dimitterentur e domo paterna, hereditatisque essent expertes. Cum enim nihil magis curæ cordique fuerit civitatibus bene constitutis, quam ut veterum civium familiarumque

Apud plerasque gentes filia a paterna hereditate excluderetur, & dote contenta esse debebant.

A 2 milix

miliæ in suo splendore atque dignitate conferuarentur, facile est ad intelligendum, qua de causa factum, ut solos filios admitterent ad paternam hereditatem. Femina enim, cum nubendo plerumque in alienam transferant familiam, paternum nomen ulterius extendere atque propagare nequeunt. Quid quod, si simul cum masculis ad hereditates fuissent admittæ, opes paternas atque auitas in alienam transtulissent familiam, splendorque paterni nominis conferuari non potuisset. Quæ omnia cum docte executus fuerit IAC. PERIZONIUS in luculentissimo commentario ad *L. Voconiam* p. 108. sqq. ad eum L. B. remittimus. Non enim permittit instituti ratio, hic transcribere ea, quæ is adduxit veterum auctorum probatæ fidei testimonia. Nec etiam addimus quicquam de coemptionis ritu, quem apud antiquissimos populos in usu fuisse, ita, ut hac ratione quasi redimeretur sponsa a manu patris, egregie docuit post PERIZONIUM I. C. p. 115. sed uberiori longe adparatu ILL. GYNDLINGIUS in *Diff. de emtione uxoris dote & Morgengaba* Cap. 1. & 2.

§. II.

Sed apud Romanos, accepta dote, simul quoque cum filiis succedebant, donec lex Voconia earum successionem coerceret.

Soli fuere Romani qui his olim non vixerunt institutis. Licet enim filiabus constituerentur dotes, tamen ex XII. Tab. simul cum filiis æquis partibus & æqualance ad patrum admittebantur hæreditates. Clarus in ea re est TRIBONIANUS §. 3. *Instit. de Legitim. Agnat. success. Lex. XII. Tab.* inquit, *simplicitatem legibus amicam complexa, simili modo omnes cognatos, siue masculos, siue FEMINAS, cuiuscunque gradus, ad similitudinem suarum invicem ad successionem vocabat.* Sed progressu temporis magis reipublicæ expedire videbatur, ut feminæ accepta dote ab omni successione excluderentur, ne gentilitiæ opes simul cum iis e paternis familiis exirent, aut ipsæ, quas in manu virorum esse oportebat, supra modum dilacerarent atque ex ea re insolenter se gererent, qua ratione

tione usum esse in suadenda lege Voconia M. Catonem auctor nobis est GELLIVS *N. A. lib. XVII cap. 6. vid. PERIZONIVS l. c. p. 134. sqq.* Illustris Fridericianæ Cancellarius DN. A LVDEWIG *de different. in Sæto-Velleiano Differ. 5. n. 42.* cuius singularia in rempublicam litterariam merita nostris encomiis longe esse maiora non dissimulamus. Erat itaque dos futura omnis filiarum hereditas, postquam Q. VOCONIVS SAXA Tribunus pl. A. V. C. DCLXXXI. Mario Philippo II. & Cn. Servilio Coepione Coss. rogationem tulit, quæ sanxit *in posterum qui post A. Postumium Q. Fulvium censores census esset, ne heredem virginem, neve mulierem faceret* CICERO in *Verr. I. c. 41.* Cum vero non nisi opulentiores censerentur, etiam saltem his scriptam fuisse hanc legem, facile est ad intelligendum. Interim tamen feminas fideicommissa & legata accipere potuisse testis est CICERO *de Fin. L. II. cap. 17.* sed summam, quæ lege Voconia legati, vel fideicommissi nomine relinqui potuit a testatore non nominat, (*) forte quia ei non digna visa fuit pro opulentia illa publica privataque populi romani quam in sua oratione nominaret; forteque ea, sic arguente laudatissimo PERIZONIO *p. 151.* ideo a rigore legis ab ipso Voconio fuit excepta, ut possent testatores honesta aliqua amoris significatione honorare feminas coniunctas, neque necesse haberent earum nomina plane testamento præterire.

§. III.

Quo autem tempore abolita fuerit lex Voconia *Disquiri-*
curate dispiciendum. Sed calculum non adiiciendum reor *tur, quando*
PERIZONIO, qui libera iam republica & adhuc ante lu- *et quare a-*
lii Cæsaris dictaturam id factum fuisse docuit, quia GEL- *bolita fue-*
lius *rit lex Vo-*
conia?

A 3

LIVS

(*) Sed ostendit PERIZONIVS *l. c. p. 144. sqq.* ex Dione, non plus quam XXV. millia drachinarum, vel C. M. festerium mulieri per legem Voconiam relinqui potuisse.

LIVS N. A. L. XX. C. 1. scribit, eam opulentia civitatis oblitteratam & opertam fuisse. Nam non satisfecit, meo quidem iudicio, DIONI L. LVI. qui clare testatur, adhuc Augusti ætate hanc legem viguisse. *Quumque enim, inquit, lege Voconia, mulieribus prohiberetur, ne qua maiorem centum millibus nummum hereditatem possent adire, ea lege quoque quasdam solvit, (Augustus.)* Quodsi igitur hac lege quasdam solvit Augustus, eius ætate adhuc viguit, neque prorsus desuetudine fuit abolita. Id interim non nego, iam ante Augusti tempora eam legem sæpe fuisse neglectam, idque factum potissimum civitatis opulentia. Cum enim divitiis abundaret civitas romana, nimiumque propterea cresceret feminarum luxus, ita, ut locupletis sæpe domus censum auribus gererent, facile evenit, ut illam pecuniæ summam, quæ lege Voconia ad eas pervenire posset, spernerent atque pro nihilo haberent, indeque testatores variâs excogitarent artes atque fraudes, ut vim eius eluderent. Erat scilicet ea lex non nisi opulentioribus, qui tantum censi solebant, scripta v. §. 11. Hinc subterfugiebant cives ditiores censum, ut hac ratione, si filias facerent heredes, satis fecisse viderentur verbis legis. (Clare id indicat CICERO Verr. 1. c. 42. ubi, P. Annius Asellus, inquit, mortuus est. Is cum haberet unicam filiam, neque census esset: quod cum natura hortabatur, lex nulla prohibebat, fecit, ut filiam bonis suis heredem institueret. HAERES ERAT FILIA: faciebant omnia cum pupilla, LEGIS AEQUITAS (quia ea saltem agebat de censu) voluntas patris, EDICTA PRAETORVM, CONSVETUDO iuris eius, quod erat tum cum Asellus est mortuus. Adit deinde: iure, legibus, auctoritate omnium, qui consulebantur, testamentum P. Annius fecerat, non improbum, non inofficiosum, non inhumanum. Quid quæso clarius dicere potuisset orator? Aperte enim indicat, legem Voco-

Voconiam fere fuisse neglectam, idque factum, partim consuetudine, partim Prætorum edictis, partim prudentium auctoritate; quia ad eos, qui non essent censi, pertinere non videbatur lex Voconia.

§. IV.

Alii patres alias excogitabant artes quibus vim Voconia legis eliderent. Cum enim per eam non nisi exiguam summam ad filias pervenire posse intelligerent, amicum instituerunt heredem, ejusque fidei commiserunt, ut filiabus restitueret hereditatem. Probat id ipse CICERO de Fin. l. II. c. 17. Sextilii exemplo, qui cum rogatus esset a Fadia patre, ut hereditatem restitueret filia, censuerunt Viri Amplissimi, non plus Fadia dandum, quam ad eam pervenire posset lege Voconia. Sed Plotius, eques romanus splendidus, eodem Cicero teste, ultro ad mulierem venit eique, nihil opinanti, viri mandatum exposuit hereditatemque reddidit. Quum igitur Augustus animadverteret L. Voconiam fere negligi ejusque vires elidi variis testatorum fraudibus, procul dubio eam iterum revocavit atque denuo stabilivit. Quod, quamvis veterum auctorum testimoniis probari nequeat, tamen id mihi semper admodum verosimile visum fuit cum & de aliis legibus idem perhibeat SVETONIUS in Aug. c. 34. Conf. PERIZONIUS, p. 209. qui tamen in eo, mea quidem sententia, decipitur, quod ante Augustum iam prorsus fuerit abolita, hac enim ratione opus non fuisset, variis artibus vim ejus elidere v. § III.

Varis artibus vim legis elidebant patres.

Qua de causa eam denuo stabilivit Augustus.

§. V.

Fuit igitur haec Legis Voconia ratio, ut hæreditas non perveniret ad feminas, sed hac cum dote, Reipubl. in-terest dotem quam acceperat, e domo patris dimitteretur, essetque constituta ea futura omnis earum hæreditas. Unde factum, ut filibus. sæpius maiores dotes iis constituerentur NEINECCIUS Antiq.

*Dotis definitio,
cuiusque necessitas.*

Antiq. rom. P. I. p. 426. §. 3. Est vero dos certa quædam res, vel universitas marito dotis nomine data, ut eo facilius onera matrimonii sustinere possit. Quamvis enim matrimonium sine dote possit consistere *L. fin. C. de donat. ante nuptias. Nov. 74. n. 4.*; tamen feminæ non facile sine ea erant locabiles adeoque reipublicæ intererat, ut dotes salvas haberent propter quas nubere possent. Vnde ille apud PLAUTVM: *habeo FILIAM grandem, DOTE CASSAM, ILLOCABILEM.* Et *Trin. Act. III. Scen. 3. v. 3.*

*Namque Hercle HONESTE fieri ferme non potest,
Vt eam perpetiar ire in matrimonium*

SINE DOTE, cum eius rem penes me habeam domi.
Imo sola fere dote a concubinis seiungebantur matronæ, vnde *idem Scen. 2. v. 63.*

Sed ut inops, infamis ne sim, ne mihi hanc famam differant,

Me germanam meam sororem in CONCVBINATVM tibi

Sic SINE DOTE dedisse magis, quam in MATRIMONIUM.
Quum itaque successione excluderentur filix, facile est ad intelligendum instar portionis hereditariæ fuisse dotem, indeque viris doctis verosimile visum, hanc potissimum ob causam filiam etiam locupletem fuisse dotandam *V. PAGENSTECHER scilicet. ad Lauterb. p. 98. Manip. I.*

§. VI.

Filiam emancipatam non fuisse dotandam ostenditur.

Id quidem nemo unquam vocavit in dubium, paternum esse officium dotare filias iisque honestam nubendi occasionem quærere, adeo, ut etiam per Præsides provinciarum atque proconsules ad id ex constitutione SEVERI & ANTONINI adigi potuerint *L. 19. ff. de ritu nuptiarum.* Sed id saltem de eo casu accipiendum, si pater

pater filiam, vel avus neprem habeat in potestate. Quodsi enim vinculum potestatis solutum eaque sui iuris sit effecta, cessat dotandi necessitas, quia ea bona propria habet, ex quibus dos constitui potest. Id, ni fallor, clare indicat PAPINIANVS L. 5. §. 12. *de iure dotum*, cum pater, ait, CVRATOR *sue filiae*, IVRIS SVI EFFECTAE, DOTE *pro ea* constituisset, magis eum, quasi PATREM id, quam quasi CVRATOREM, fecisse videri. Non igitur pater iure obligatur, ut dotem ex suis bonis constituat filiae emancipatae; sed saltem videtur in dubio pietatis officio ductus eam dedisse filiae. Quodsi autem clare exprimat, se de bonis filiae eam constituere nihil contra jus facit VINNIVS *Quaest. Select. lib. 11. c. 14.* Potest proinde pater, licet filia e potestate exierit, ei vel de propriis bonis, vel de ipsius bonis filiae dotem dare. Accedit VLPiani testimonium c. L. 5. §. 11. *si pater*, inquit, *pro FILIA EMANCIPATA DOTE dederit, profectitiam nihilominus dotem esse nemini dubium est, quia non IUS POTESTATIS, sed PARENTIS NOMEN profectitiam facit, sed ita demum si ut parens dederit: ceterum si, cum deberet FILIAE, voluntate eius dedit, adventitia dos est.* Ergo non exigunt leges, ut necessario dotem de suo constituat emancipatae, sed expressis verbis distinguunt, an ut pater, an vero ut debitor filiae dotem dederit. Et L. 51. *ead.* idem VLPIANVS adserit, *si res emancipata pater donavit, ex voluntate eius postea in dotem pro ea datae sunt: A FILIA dotem, non A PATRE videri datam?* Facile enim exinde patet, nullo iure patrem cogi, ut filiae emancipatae locupleti dotem de suo constituat. Sed si is filia nomine dotem promississet, & eam ante nuptias emancipasset, non resolvitur promissio, nam & cum ante nuptias pater moreretur, nihilominus heredes eius ex promissione obligati manebunt L. 44. *pr. eod.* Quid

B

clarius,

clarius, quæso, dicere potuisset Ictus ? promisit pater dotem antequam emanciparet filiam, & ideo obligatur. Quid si itaque eam non promisit, etiam cogi nequit, ut eam constituat emancipatæ. Immo inanis prorsus ac risu digna fuisset quæstio : an dotis promissio emancipatione resolvatur ? si pater invitus cogi potuisset, ut ei constitueret dotem V. STRYCKII *jun. Diss. de dote non promissa præstanda* §. 22. LAVTERBACHII *Diss. de donatione propter nuptias* th. 75. PERIZ. *ad Cod. de dotis promissione* n. 6. WISSENBACH. p. 1. *disput.* 46. th. 8. RACHOVIVS *ad TREVTLERVM* Vol. 2. *Disput.* 7. th. 2. *lit. d.* qui tamen officio magistratus adigi posse patrem, ut doter filiam emancipatam tunc admittit, si egeat, nec sine ea honestam nubendi occasionem invenire possit VINIVS *l. c. p. m.* 355. Nec est prætermittendum PAGENSTECHERI argumentum *scilicet*, *ad Lauterb. Munip. l. p. 99.* Dos enim legitimæ portionis loco data fuit filiabus. Hinc cum emancipatione legitima successionis iura amitteret filia sui iuris facta, etiam dotis nomine nihil poterat exigere.

§. VII.

Noatur eorum error, qui credunt, ideo dotandam fuisse filias divites, quia i. Vocon: successionis erant expertes, Postquam itaque dedimus demonstratum, filiam emancipatam, quæ ipsa habet unde dotari, vel alias honestam nubendi occasionem invenire possit, a patre invito non esse dotandam; ostendendum nunc curate, quid in transuersum egerit viros doctos, dum ideo filiarum locupleti dotem fuisse constituendam adserunt, quia dos ex ratione Legis Voconiarum omnis futura earum fuerit hereditas PAGENSTECHER *l. c. p. 98.* Quis vero adeo hospes in romana prudentia, qui nesciat, nullam olim fuisse peculiorum differentiam omniaque pleno iure acquisivisse liberos parentibus. Testis sane est omni exceptione maior DIONYSIVS HALICARNASSEVS *Ant. Rom. L. VIII. Romanis*, inquit, *filiis nihil proprium est vivis patribus, sed*

& p.

& pecunias & corpora liberorum patribus ad eorum arbitrium tradidit lex Romuli. Et SENECA de beneficiis L. VII. c. 4. omnia, ait, patris sunt, quæ in manu liberorum sunt. Nihil itaque erat liberorum, nisi iure peculii ex permisso patris. Sed factum progressu temporis, ut castrense & quasi castrense peculium pleno iure ad filios pertineret IVVENAL. Satyr. 16. v. 52. pr. J. per quas personas cuique acquiritur L. fin. C. de inoff. Testam. Quid vero hoc ad filias? Hæ adhuc nihil habebant proprii, sed omnia quæ quocumq; titulo acquirebant, pleno iure erant patris. Ex his igitur facile est ad intelligendum, frustra quaeri: an filia locuples fuerit dotanda? De emancipata enim, quod iterato monemus, non est quæstio, quia ad hanc dotandam iure cogi nequit pater; sed de ea quæ adhuc sub potestate patris agit. Illa autem quæ est sub manu, nihil habet proprii quocumque etiam titulo id acquisiverit, ergo etiam locuples non est. Postquam vero Imperatores & filiabus peculia proprio iure concesserunt, evenit, ut nunc essent locupletes. Primus enim fuit CONSTANTINUS Magnus qui in bonis maternis liberis proprietatem, & patri tantum, quoad viveret, permisit usumfructum l. 1. C. de bonis maternis, quæ constitutio plenior exstat in Cod. Theod. L. 1. eod. deinceps GRATIANUS, VALENTINIANUS & THEODOSIUS idem statuerunt de bonis materni generis l. 6. C. Th. eod. id quod firmarunt HONORIUS & ARCADIVS l. 7. C. Th. eod. l. 2. C. eod. Quod tamen a THEodosio & VALENTINIANO, LEONE & ANTHIMIO l. 1. 4. & 5. C. de bonis liber. ad lucra nuptialia & sponsalitia porrectum fuit. Tandem IUSTINIANUS l. 6. C. eod. disposuit, ut si quid liberi aliunde sibi acquisiverint ex quacumque etiam causa, sive liberalitate fortunæ, sive laboribus suis, ejus usumfructum haberet pater, sed proprietas esset penes liberos. Sunt tamen plures ca-

ius in quibus nec in adventitiis patri acquiri usumfructum voluit L. 7. 8. & Auth. excipitur C. de bonis quæ liber. vid. V. C. GERHARD NOODT de usufructu l. 2. C. 4. p. m. 608. 609. SCIPIO GENTILIS de bonis maternis. C IV. seq.

§. VIII.

Inventa peculiorum differentia primum quæri potuit; an dotanda sit filia locuplex?

Ex hoc primum tempore potuit moveri quæstio: an dotanda sit filia familias locuples? Quod si itaque quis mente præcipiti affirmare audeat, adhuc eam dotandam fuisse, quia femina L. Voconia heres esse non poterat, nã! is vehementer errat. Jam enim probavimus clare §. III. & IV. post tempora AUGUSTI eam abolitam sensimque feminas simul cum masculis ad paternas admittas fuisse hereditates. Quod si igitur filia paternæ hereditatis non fuerunt expertes, etiam dos non fuit instar portionis hereditariæ. Finge nunc, filiam esse locupletem, finge, eam vel fortunæ liberalitate, vel labore suo sibi nec acquisivisse peculium. Quid nunc statuendum? Exigitne officium patris, ut eam dotet de suo? Videamus quid sentiant quibusque utantur argumentis non infimi ceteroquin subsellii J. ti, dum adhuc patris esse, constituere filia dotem, probare allaborant. Sunt in hoc numero BALDVS in L. ult. C. de dot. promiss. & de Dote p. 6. privil. 16. n. 8. IASON in §. fuerat n. 98. sequent. J. de Action l. 1. ff. solut. matrim. GALLVS L. 2. obs. 95. n. 14. seqq. SICHARDVS in l. ult. C. de Dot. promiss. PALAEOT. de nati. & spur. C. 49. seqq. BRONCH. 3. ad fr. 14. IOAH. 2 BEYST de iure connubiorum & dotium l. 3. C. 4. PERETZ de dote Prom. num. 8. PAGEN-TECHER l. c. SCIPIO GENTILIS de bon. matern. c. XXVII. p. 197. VVLTEL Confil. Marburg. V. 2. Conf. 49. n. 4. ZOESIVS de iure dot. n. 8. Hos autem minus recte inire rationes comprehensu non est difficile. Urgent enim 1) quod favorabilior sit causa dotis, quam alimentorum eo quod pater alere

non

Removetur prima obis.

dotanda filia locuples?

non teneatur filiam locupletem, bene autem dotare eum dos comparetur legitimæ, quæ locupleti etiam debetur filiæ, adeoque non procedat argumentum a negatione alimentorum ad negationem dotis. At vero cum unanimi ore confiteantur pragmatici, filiam divitem a patre alendi non esse per *L. 5. §. 7. ff. de agnosc. liber.* & deinde ad dotandum non jure actionis, sed officio judicis cum compelli posse *GAIUS l. c. n. i. seqq. CARPZ. P. 2. c. 42. def. 12.* illa sane æquitas, cui judicis officium, ut scilicet habeat unde sustinere possit matrimonii onera, cessat, si ipsa filia sit locuples atque dotem sibi constituere queat, cessat & illa ratio cogendi patrem, ut filia honestam nubendi conditionem inveniat *l. 19. de R. N.* Ex quo nunc confit, utique procedere argumentum a negatione alimentorum ad negationem dotis, quia par utroque casu adest ratio *BACHOV. ad TREVL. Vol. 2. Diff. 7. th. 2. litt. C.* Quid quod maior adhuc alimentorum quam dotis sit necessitas, quod exinde probat *WISSENBACHIVS P. 1. Disp. 46. th. 8.* quia libertus patroni liberos alere teneatur *l. 5 §. 20 de agnosc. & alend. liber.* non autem dotare, sic filius matrem alere jubetur, non autem dotare *l. 13. §. fin. de administ. & peric. tutor.* Imo frater sororem uterinam suis sumptibus exhibere teneatur *l. 4 ubi pupill. educ. in matrimonium vero collocare non urgetur l. 12. §. pen. l. 13. §. fin. eod. l. 1. §. 2. de tutor. & rat. dist.*

§. IX.

Nec 2) firmiori talo illud nititur argumentum, quod dos succedat in locum legitimæ. Nam hæc primum debetur liberis post mortem patris, dos autem a patre vivo constituitur filiabus, ut conditionem nubendi invenire & onera matrimonii sustinere possint. Ubi itaque hæc ratio exulat, nemo non intelligit, simul exulare dotandi necessitatem *CARIZOV l. c. def. 13. NICOL. ma desum-*

EVERHARDVS in *loc. leg. loco* 28. DVARENVS in *Tit. soluto matrim. C. 3.* TVLDEN in *Cod. de dotis promiss. n. 7.* Unde etiam CONANVS *Comment. L. VIII. C. 8. n. 7.* satisfecisse putat patrem officio, si sine dote honestam nubendi occasionem invenire possit filiae. Quae sententia, si iusta expendatur trutina legibus & rationibus, convenit. Solent quidem 3) interpretes vulgares provocare ad *leg. 29. C. de inoff. Testam.* Sed nihil est in ista lege de filia locuplete dotanda, quia saltem disponit Imperator ZENON, dotem ad excludendam inofficiosi querelam in legitimam esse imputandam. Non vero sequitur, dos legitimae imputatur (*) ergo par legitimae & dotis est ratio.

§. X.

Non ex L.
Julia cogi-
tur pater
ad dotan-
dam filiam.

Sunt & 4) alii qui legem Juliam in *l. 19. de R. N.* non distinguere autumant, an filia sit locuples, nec ne, indeque magna clamant voce: lege non distinguente nec nostrum est distinguere WISSENBACH. *P. 1. disp. 46. th. 8.* Sed vehementer decipiuntur. Quoniam enim sit illa lex Julia ipsimet ignorant interpretes. Est propterea admodum mihi opinabile, recte subducere rationes V. C. CORNELIVM VON BYNCKERSHOEK *L. IV. obs. C. 13.* quando nihil cautum hac de re fuisse in L. Julia, sive de adulteriis, sive de maritandis ordinibus existimat, quia rigor

(*) Quod tamen olim fecus. Ex constitutione enim ALEXANDRI *l. 1. & 2. C. Gregor. de inoff. Testam.* id quod pro filia in dotem datum est aut promissum in Falcidiam h. e. legitimam imputari non poterat. Quia ea vivo patre a bonis ejus separata fuit, legitima autem est computanda a tempore mortis *l. 6. C. cod. v. SCHVLTING in Jurispr. ante Justin. p. 680.*

rigor patriæ potestatis, qui eo tempore adhuc durabat, id non admittebat. Marcianus igitur in L. XVI. *Instit.* interpretatus est C. XXXV. legis cujusdam Julæ, & hac occasione retulit constitutionem Severi & Antonini, quam compilatores inseruerunt Pandectis præscripto L. XVI. *Inst.* adjectoque capite, ubi ejus mentionem fecerat Jctus. Nec hic conjectura opus, cum verbis expressis dicat, ex Constitutione Severi & Antonini, ergo non ex Lege Julia, cogendum esse patrem, ut conditionem quærat filiæ. Nam hoc tempore jam patriæ potestatis rigor paulatim fuit mitigatus.

§. XI.

Quæ cum ita sint, mirari subit B. STRYCKIVM in *Respondetur B.* *Caut. Contr. l. III. C. 8. §. 13. & V. M. de jure dotium §.* 2. in adversariorum militare castris. Cujus propterea *stryckii argumentis.* argumenta hic sub incudem vocare operæ erit pretium. Existimat enim, ideo filiæ locupleti a patre dotem esse constituendam, ut optimam nubendi invenire queat conditionem. Sed quis, quæso, non facili negotio animadvertit, cessare patris officium, si filia ob propria bona honestam matrimonii conditionem invenire possit. Idem interim quod STRYCKIVS sentit MYNSINGERVS *Cent. Refellitur.* VI. *obs. 8c.* utiturque hoc argumento: qui ex duplici *Mynsingeri.* causa obligatur, præsumitur se primo ab eo quod debet ex causa duriori liberare voluisse *l. 4. d. S. lut.* Sic itaque cum pater est debitor duobus nominibus, primo ex officio paterno, quod ei imposuit necessitatem dotandi filiam, deinde est debitor filiæ, quia tanquam pater ejus restenec, durius autem obligatur ex suo officio, quia illud est ex lege indeque in dubio a legali obligatione se liberare voluisse præsumitur *l. fin. de a te promiss.* Sed cui mens adeo levis, pectusque adeo obtusum, qui non labi MYNSINGERVM intelligat. Patris utique est officium

cium constituere dotem filiabus, sed quando? & quare? Si ipsa habeat nihil, & dein si alias honestam nubendi occasionem inuenire nequeat. Ubi itaque ratio dotandi, cui innititur patris officium, cessat, ibi etiam illud definit.

§. XII.

*Remouetur
obsectio ex
L. fin. C. de
dot. promiss.
petita.*

Pergimus §) ad *L. fin. C. de dotis promiss.* ad quam cum B. STRYCKIO ad unum fere omnes, qui filiam diuitem dotandam esse a patre falso sibi persuadent, confugiunt. Rescribit ibi Iustinianus: *Neque enim leges incognitæ sunt, quibus cautum, omnino paternum esse officium dotem dare pro sua progenie.* Sed ex his verbis nondum elucet, quæ fuerit mens imperatoris, quæ de causa ostendendum curate, nihil esse in hac lege quod nobis aduersetur. Agit videlicet imperator de patre habente usumfructum in bonis adventitiis liberorum. Quod si igitur hic dotem dederit filiæ, non expresso de cuius patrimonio, censetur dedisse eam de suo ipsius patrimonio. Sed si dixerit, se dotem dare de suo & filiæ patrimonio, tunc si est inops, censetur dedisse eam de filiæ patrimonio: sin vero locuples censetur eam summam, quam expressit, dedisse de suo ipsius patrimonio, & tantumdem tacite voluisse ex bonis adventitiis accedere filiæ, in quibus habet usumfructum, quem eatenus tacite remisisse intelligitur. His fere verbis summam legis refert ex BALDO VINNIUS *l. c. p. m. 358.* Diverſa enim omnino est quæstio: an pater cogatur promittere & dare dotem filiæ locupleti, & si eam ultro promiserit ex quibus bonis hoc fecisse videatur? Quid itaque si expresse dicat: se dotem dare de bonis filiæ quæ bona propria pleno iure habet, hoc est quorum ususfructus non pertinet ad patrem? Hic quidem casus in dicta lege non deciditur, sed debet decidi ex iis quæ §. VI. disseruimus. Nam dum pater, simpli-

dotanda filia locuples?

simpliciter dotem dedit, eam de suis bonis ex liberalitate & donandi animo dedisse intelligitur l. 5. §. 2. de Jure Dot. Neque eum, licet adserat contrarium, esse audiendum jubet legislator, quia cum clarius loqui debuisset, sibi imputare debet, quod id non fecerit VINNIVS l. c. BACHOV. l. c. litt. c. HYBERVS de Jur. Dot. n. 4. CARPZ. p. 2. Const. 42. defin. 13. CARDIN. MANTICA de tacitis & ambiguis convent. L. XII. T. 19. n. 1. seqq.

§. XIII.

Quamvis vero CARD. MANTICA l. c. n. 13. eorum subscribere videatur sententiæ, qui filiam locupletem dotandam esse contendunt, tamen postea eas subiicit limitationes, ut tandem n. 29. nobiscum sentiat. *Examinantur ea quæ habet* CARD. MANTICA. *ter, inquit, præsumitur filie dotem dedisse vel promississe de suis bonis, quando NOMINE PROPRIO eam dedit vel promisit, vel etiam simpliciter ut loquitur d. l. Ult. de dot. prom. Diversum est, si dederit vel promiserit NOMINE FILIAE, ita, ut voluerit ejus negotium gerere: tunc enim præsumitur magis dotem dedisse de bonis ipsius filie.* Sed in eo vehementer errat MANTICA, quando adserit, præsumi patrem de suo constituisse dotem, si id expresse dixerit, de bonis autem filie, si id clare indicaverit. Quod si enim satis constat de ejus voluntate, nulla præsumptione opus.

§. XIV.

Est vero hæc præsumptio quæ militat contra patrem ex Dd. sententia juris & de jure, quæ contrarii probationem non admittit MENOCH. L. III. pres. 15. n. 5. *Præsumtionem, quæ militat contra patrem, inepte præsumtionem juris & de jure esse dicunt. Dd.* Sed quam inepte id, quod contrarii probationem non admittit, dicatur præsumptio egregie docuit ILL. THOMAS. in Diss. de præsumpt. allodial. §. 15. seqq. Quamprimum enim is non auditur, qui ut admittatur ad contrarii probationem urget, statim evanescit præsumptionis idea & cunct. Dd. adest

adeſt aliquid a præſumptione plane diverſum. *MENOCIUS* igitur hic talpa cæcior *Gloſſatorum* in ſtatura grandiori exſcripſit volumina, & ita omnia commiſcuit, ut tandem quid velit ipſe nesciat. Quod quam verum ſit ex eo nemo non intelligit, quod quidem eam, de qua nobis eſt ſermo, præſumptionis juris & de jure inſigniverit nomine, & tamen *conſil.* 370. n. 11. adſerat, admit- tendam eſſe contrarii probationem *BRUNN. ad l. fin. C. de dotis promiſſ.* Pertinet itaque potius diſpoſitio dictæ *l. fin.* ad ſanctiones pœnales, quæ non audiendum eſſe patrem volunt, ſi ad probationem contrarii ſemet ad- cingat idque in pœnam, quia clariuſ loqui atque verbis indicare debuiffet expreſſis, ſe dotem filiæ locupleti non de ſuis, ſed de ipſius filiæ conſtituere bonis. Ita clara ſunt omnia, nec opus, ut evolvas *Menochium*, cujus miſeram diligentiam, meliora edocti, ridemus. *Conſ. III. THOMAS. ad Lancell. p. 581. n. 568. III. BÖHM. in Diſſ. de collifione Præſumpt. C. 3. & in Jure Eccleſiaſt. Pro- teſt. L. II. T. 22. §. 9. 10.*

§. XV.

*Queritur:
an ſemper
& ſimplici-
ter filia
locuples ex
bonis pro-
priis poſſit
dotari?*

Reſtat, ut perpendamus cum cura, an ſemper & ſimpliciter pater dotare poſſit filiam de iis bonis quæ ea proprio jure habet, ſive ipſi uſufructus competat, ſive non. Distinguendum hic eſſe docet *BACHOVIVS l. c. 1b. 2. litt. c.* an filia bona quædam habeat pleno jure eoque caſu patrem ad dotandum teneri negat, an tantum proprietatem nudam eorum, & hic ex cauſa ſtatuendum, ut ſi forte uſufructus ſit ampluſ & alias pater in re lau- ta, ipſe de ſuo dotem conſtituat; cum & ei hoc caſu al- imenta de ſuo præſtare teneatur *l. fin. §. 5. & verſ. cum enim C. de bonis quæ liber.* Niſi forte velit pater potius remiſſo uſufructu plenum eorum juſ ex cauſa dotis transferre. *BACHOVIVM* ſequitur *VINNIVS l. c. p. III. 359.*

Eſt

Est enim tralatitium, confarreationis & coemptionis ritu solutum fuisse patriæ potestatis vinculum, quia eas in manu maritorum esse dixit GELLIVS *L. IV. C. 3. L. XLIX. c. 6.* In duorum vero potestate & duobus filiafamilias esse nequit SCHVLTINGIUS *Jurisprud. Ante-Justin. p. 590. n. 2.* NOODT *L. II. Prob. Jur. c. 9.* Ut itaque mirari subeat, esse nonnullos qui secus sentiant, quos solide confutavit V. C. HEINECCIUS in *Syntagm. Antiq. Rom. P. 1. p. m. 135. §. 6. seqq.* Sed quemadmodum non semper conveniebant in manum mariti, ita factum demum, ut confarreationis & coemptionis ritus plane abiret in desuetudinem. Cuius causam reddit SCHVLTINGIUS, quia videntur mulieres, postquam auctæ sunt opes & emolliti mores, non ita amplius voluisse se se & sua omnia maritis subiicere, sed simpliciter nuptias contrahere, sive in matrimonium convenire, quomodo id exprimit GELLIVS *L. XLIX. c. 6.* & addit, matronam dictam proprie quæ in matrimonium cum viro convenisset, quam distinguit ab ea, quæ erat in manu mancipioque. Qua etiam motus ratione laudatus SCHVLTINGIUS non subscribit CUIACIO qui in *l. 15. de R. N. & L. 121. §. 1. de V. O.* malam Triboniani manum agnoscit putatque, Papinianum scripsisse, in manum convenire.

Filia per confarreationem & coemptionem exhibet e manu patris.

Indicatur causa cur confarreationis & coemptionis ritus in desuetudinem abierit.

§. XVI.

Ex his igitur facile cognoscimus, non omnes olim uxores fuisse in manu mancipioque maritorum. Vnde CICERO in *Topic. C. III.* distinguit inter eas quæ in manum convenerant & quæ tantum uxores erant. Vanescente itaque confarreationis atque coemptionis ritu, hoc ritu si filia manebat, et si nuberet, in P. P. manebant filiæ in patris potestate, et si contraherent matrimonium, ut bene ILL. GYNDLINGIUS in *Digestis de Adopt. & emancipat. p. 90. §. 16.* Et ita accipienda *l. 1. §. fin. ff. de liber. exhib.* ubi si qui filiam suam, inquit VLPIANUS, que

quæ mihi nupta est, velit abducere, vel exhiberi sibi desideret: an adversus edictum exceptio danda sit, si forte pater concordans matrimonium, forte & liberis subnixum, velit dissolvere? Et certo iure utimur, ne bene concordantia matrimonii IURE PATRIÆ POTESTATIS turbetur: quod tamen sic erit adhibendum, ut patri persuadeatur, ne ACERBE PATRIAM POTESTATEM exercent. Quam Legem belle explicat v.c. NOTI *de Usufructu* L. 1 C. 8. p. m. 557. Quodsi itaque filia haberet bona propria, quorum ususfructus pertinebat ad patrem, in cuius erat potestate, non est amplius comprehensu difficile, quare paternum sit officium filiæ constituere dotem vel ex propriis bonis, vel remittere adventitiorum ususfructum & illa pleno iure transferre dotis nomine in filiam. Summatim: Quæstio: an dotanda filia locuples? eo tempore, quo vivebat lex Voconia, erat otiosa, quia filiafamilias nihil habebat proprii adeoque etiam locuples non erat (v. §. VI.) emancipata vero si propria habebat bona sibi ipsi poterat constituere dotem, sin secus, officio iudicis ei succurrendum fuisse videtur (v. §. VI.) sed ad inventa peculiorum differentia vel pleno iure ea pertinent ad filiam, & tunc pater ex illis eam dotare potest (v. §. VII.) vel patri eorum competit ususfructus, & tunc vel ex propriis bonis dare dotem, vel ususfructum, quem habet iure patriæ potestatis, cum filiam nuptam retineat in potestate, remittere debet (v. §. XVI.)

CAP. II. AN JVRE GERM. FILIA LO- CVPLES DOTANDA?

§. I.

Germanorum legibus filias olim ordinarie cum masculis ad successionem bonorum; inprimis immobilium, non fuisse admittas, nemo est qui ignorat. Erant enim bona gentilitia familiæ conservandæ gratia data atque destinata nobilibus. Sed filiæ nubendo in aliam transeunt familiam, suntque soli mares familiarum sustentacula. Cautum igitur legibus ANGLORVM & WERINORVM L. 1. Tit. 6 hereditatem defuncti filius, non FILIA suscipiat: si filium non habebit qui defunctus est, ad FILIAM PECUNIA & MANCIPIA, terra vero ad proximum paternæ generationis consanguineum pertineat. Et lege familiæ, quam BYCHARDVS WORMATIENSIS scripsit apud FRANCISCVM PITHOEVM in *Glossar. ad libros Capisular. edit. Baluzianæ* p. 703. dispositum: si ex familia vir aliquis & uxor obierint & filium cum FILIA reliquerint, filius hereditatem servilis terræ recipiat, FILIA autem VESTIMENTA MATRIS & PECUNIAM OPERATAM recipiat. Deinde in legibus salicis Tit. LXII. §. 6. statutum: de terra vero salica in MULIEREM nulla portio hereditatis transiit, sed hoc virilis sexus acquirit, hoc est filii in ipsa hereditate succedunt. Sed filias deficientibus masculis etiam ad hereditatem tandem terræ salicæ fuisse admittas, lex RIPVARIORVM clarissime his indicat verbis: sed cum virilis sexus extiterit, FEMINA in hereditatem aviaticam non succedat. Sexu itaque virili deficiente regula

gula erat sublata, quod egregie observat CL. ECCARDVS ad LL. *salic. l. c. p. 707. 708.* SCHULTERVS ad *jus feud. Alem. C. LXIV. §. 7. p. 330. & Exercit. ad ff. XLI. ib. 59. seqq.* ILL. GVNDEL. in *Diff. de statu reipubl. Germ. sub Conrado I. §. 7. p. 54. litt. c.* Imo deinde eandem legem displicuisse Francis, excepta regni successione, docuit CUIACIUS *L. VIII. Obs. c. 14.* De SAXONIBVS itidem res certa est quod ex *L. 1. art. 17.* discimus: Vaters, und Mutters, Schwester oder Bruders Erbe nimmet der Sohn und nicht die Tochter. Es sey dann daß da kein Sohn sey, so nimmet es die Tochter. Quæ speciminis loco adduximus ad ostendendum quæ fuerit olim juris succedendi ratio. Plura habet B. STRYKERIUS *de S. A. J. Diff. II. c. 11. §. 14. seqq.*

§. II.

Queritur: an igitur dos fuerit instar portionis hereditariae idque negatur.

Licet vero filia olim non æquis partibus cum filiis ad paternam admitteretur hereditatem, tamen non prorsus eam maternæ successione fuisse expertem abunde probavimus. Quodsi igitur nonnemo filiae a patre constituendam fuisse dotem mente præcipiti affirmaret, licet ipsa bona haberet adventitia, quia dos instar portionis hereditariæ fuerit, is vehementer erraret. Memorat enim TACITUS *de M. G. c. 18. dotem non vxor marito, sed vxori maritus adfert.* Intersunt parentes & propinqui ac munera prebant: munera non ad delicias muliebres quæstia, nec quibus nova nupta comatur, sed boves & frenatum equum, & scutum cum fiamæa gladioque. In hæc munera uxor accipitur atque invicem ipsa ARMORVM aliquid viro adfert. Ex quo simul confit, etiam feminam marito aliquid attulisse. Factum inde, ut cum ditiores esse coepissent Germani, ex parentum, vel sua substantia etiam aliquid adportaverint marito. Quidquod jam CAESARIS ætate viros dotem accepisse ab uxoribus

ribus

locuples dotanda?

ribus in memoria is prodit de *B. G. L. VI. c. 19.* Enimvero postquam Latii scita irrepsit in Germaniam, hæc quoque, quæ e domo paterna marito intulit uxor, dotis nomine venire cœperunt, *ILL. GYNDLING. de Emt. uxor. dote & Morgengaba C. II. § 11. seqq.*

§. III.

Ex quo itaque tempore dos constitui cœpit in Germania filiabus, in eo potissimum differebat uxor legitima a concubina, quod illa dotem, hæc vero nullam haberet, pari ratione uti apud Rom. v. C. I. §. V. Integram tamen J. G. cum concubina iniri poterat matrimonium, licet non legitimum, hoc est, indotatum. Vnde nec liberi ex regula admittebantur ad successionem. Quæ omnia doctissime explicat *ILL. BÖHMERS in Jure Eccles. Protest. L. III. tit. 2. §. 15. seqq.* Vxor igitur quæcum legitimum intercedebat matrimonium etiam dotem adferebat marito. Qua de causa nunc quæritur: *Vnde quæritur: an a patre dotanda filia* Fueritne dotanda a patre filia, quæ bona habebat adventitia? Est vero mihi admodum opinabile, eorum populorum institutis, quæ filias ab hereditate paternâ, existentibus filiis, excludebant, locupletem etiam filiam fuisse dotandam, ex quo scilicet tempore Romanorum scita Germanis placuerunt, quæ volunt, ut pater dotet filiam. Licet igitur habeat adventitia, indeque honestam nubendi invenire possit conditionem, tamen aliquid instar portionis hereditariæ nuptiarum die dotis nomine marito a patre sponsæ datum fuisse facile mihi persuadeo. Est enim dispositum in lege *LONGOBARDICA L. II. Tit. 1. leg. 4. Habeat ipsa mulier Morgengab, & quod de PARENTIBUS ejus adduxerit, id est, PHADERIVM & Tit. XIV. lege 15. Vidua habeat sibi Morgengab & Methium: de PHADERIO autem, id est, de ALIO DONO, quantum PATER, aut FRATER dederit ei, quando, ad MARITVM AMBYLAVERIT, mittat in consu-*

Vnde quæritur: an a patre dotanda filia locupl.?

consu-

Cap. II. *An Jure Germ. filia*

confusum cum aliis sororibus. Idem patet ex ALEMANNORUM decretis C. LV. si quis liber mortuus fuerit, & reliquit uxorem sine filiis aut filiabus, & de illa hereditate exire voluerit, & nubere alii sibi c. equali, sequatur eam dos legitima & quidquid PARENTES EIVS legitime PLACITAVĒRINT, & quidquid de SEDE PATERNA secum attulit, omnia in potestate auferendi, quodcunque non manducavit, aut non vendidit. Clare ex his, ni fallor, patet, apportasse aliquid uxorem, quod e manu parentum acceperat idque dictum Faderium, a voce Fader, Vater & Erbe, Erbe, Erbe & denotasse Vater Erbe, quod propterea succedebat in locum portionis hereditariae, a qua Teutonum moribus fere excludebantur feminae. Sed his vaneſcentibus, etiam simul evanuit necessitas dotandi filiam locupletem.

§. IV.

*J. G. filia
nubendo li-
beratur. a
P. P.*

Interim tamen in eo est dispar ratio, quod filia nubendo non exierit J. R. e patris potestate, ex quo scilicet confarreationis & coemptionis ritus in desuetudinem abiit v. C. I. §. XVI. Sed J. G. eo ipso, dum filia nubit ab ea liberatur v. ILL. BÖHMERT *Diss. de statu liberorum sui juris factorum per separationem vel nuptias.* c. 2. & ILL. THOM. *de V. P. Tit. J. de patria potestate* STRYCKIUS *Jun. dissert. de dose prom. non praestanda* §. 21. Notatu digna sunt quae hanc in rem attulit de ANGLORUM moribus COWELLES *in Instit. Jur. Anglic.* L. 1. tit. 9. §. 2. & 3. *Intelligendum est veter. illam potestatem quam Romani in suos liberos habuerunt, multo apud nos (sc. Anglos, quod vero de his dicitur, id uniuersim de Germanis est dicendum, recte sic auguente ILL. THOMAS. de Quasi Emancip. Germ. §. 12.) esse remissiore.* Nam Angli per soiam liberorum suorum, qui adhuc minores 21. annis sunt industriam sibi adquireunt: idque ea conditione, si apud se retineant,

tineant, & in suis negotiis exerceant & victum vestitum-
que illis suppeditent. Nam si aliis tradantur in aliqua
arte instituendi, heros suis laboribus reddunt locupletiores,
nisi tamen aliter conventum fuerit, quia conventio legem
vincit. Quodcunque PECULUM sive ADVENTITIVUM sive
PROFECTIVUM, ut dum castre, se liberis contingit, ejus nec
VSYMFRUCTUM quidem pater adsequitur, sed RATIONI RED-
DENDAE obnoxius manet: Et Tit. 12. §. 4. Tam ortus
apud nos non est P. P. nexus, quam apud Rom. fuit:
sic neque est tam SOLENNIS ejusdem per emancipatio-
nem SOLVTIO. Nam nihil inter nos reperio, quod pro-
hibet filium vel FILIAM, cum annum vigesimum primum
impleverit, v. l. INVITO PATRE esse SUI IVRIS. Ne
vero gratis dixisse videamur, idem quod de Anglis ad-
scribit COWELLES Germanorum convenire moribus, ope-
ra erit pretium ALEMANNORVM SAXONVMQUE ad-
ducere decreta. Ita enim in Spec. Sax. I. 1. Art. 11.
Hat ein Vater seine Kinder in Vormundschaft nach ihrer
Mutter Tode, wenn sie sich darnach von ihm scheiden, er soll
ihnen lassen und geben alles ihr Mutter-Gut: es sey ihm den
von Unglück, und ohne seine Schuld, abgegangen. Licet
autem liberi e parentum potestate fuerint dimissi, ta-
men, antiquis moribus sublatis, si ea quæ ab iis acce-
perunt postea conferunt, illis salva manent successionis
jura. Clare id indicat art. 12. Spec. Sax. L. 1 his verbis:
Eundert der Vater und die Mutter einen ihrer Söhne und
Töchter von ihm mit ihrem Gut; sie sondern sich mit der
Kost oder nicht, wollen sie nach des Vaters oder Mutter
Tode, ihr Erbtheil wieder ansprechen, der Bruder gegen den
Bruder, oder die benante Tochter gegen der ausgestatteten
Schwester, sie müssen in die Theilung wieder einbringen, mit
ihrem Eyd alles das Gut, da sie mit abgesondert waren, ob
es fahrende Habe ist, sonder Gerade. Ist es aber ander
Gut, das man beweisen mag, da mögen sie nicht für schwe-
ren.

ren. Hätten sie auch ihre Erbtheilung davon verlobt, der sollen sie entbehren, sie wieder reden es denn auff dem Heylinggen &c. & art. 19. L. 2. der Vater mag den Sohn wohl von ihm sondern mit etwas seines Gutes vor Gericht, das der Sohn annehmen will, wie wenig es sey.

§. V.

Merius ostenditur, per Nuptias solui P. P. vinculum.

Ex his itaque discimus J. G. liberos invitis parentibus separata bona habere sibi que vivere potuisse. Probat id Spec. Suev. c. 382. his verbis: der Vater soll seinen Sohn von ihm sondern so er fünf und zwanzig Jahr alt ist, mit als viel Gutes als er geleisten mag, also daß ihm das mehrer Theil bleibe. Und thut er das nicht gern, der Sohn nöthiget ihn des mit recht wohl vor seinen Richter.

V. ILL. THOMASIVS *de quasi Emanc. Germ.* §. 23. 24. Cum igitur filia nubuit soluitur patriæ potestatis vinculum, quod Romanorum legibus plane aduersum. V. ILL. WÖRMERI *Diff. de statu liber. sui Jur. factor. per separ. vel nuptias* C. II. §. 9. qui simul inficitis eorum satisfecit objectionibus, qui Saxonum quidem institutis filiam nubendo exire e patris potestate credunt, sed longe aliud esse dicendum de iis prouinciis, ubi Juris Saxonici nulla auctoritas. Est enim ostensum clare, non Saxonum solum, sed omnium Germanorum moribus id obtinuisse. Quin vero pro patriis legibus tamdiu sit præsumendum, donec dederint demonstratum, quod eas migraverint Teutones, & peregrina iura receperint, nemo, nisi quandam menis diminutionem sit passus, vocabit in dubium. Nec ea quæ emancipationum adducunt exempla evincunt, usu esse recepta Romanorum placita. Vfus enim ponit frequentiam. Quis autem una forte hirundine volitante statim vernum adesse tempus adsereret?

§. VI.

Vnde fuit ei etiam re-

Habemus igitur pro certo, eo ipso dum filia nuptias celebrat exire eandem e potestate parentum eique resti-

restituenda esse bona aduentitia uniuersa. Ex quo nunc ^{restituenda}
 facile est ad concludendum, quodsi filia ipsa sit locuples, ^{esse aduen-}
 patrem nullo modo cogi posse, ut eam de suis dotet ^{tilla.}
 bonis. Nam eo ipso dum nubit soluitur patriae pote-
 tatis vinculum, restituantur aduentitia, ex iisque dos pot-
 est constitui, ut eo facilius sustinere possit matrimonii
 onera. J. R. enim, quia pater retinebat filiam nuptam in
 potestate, simul usufructum aduentitiorum sibi vindica-
 bat indeque vel hunc remittere, vel de suo eam dotare
 debebat C. 1. §. XV. Sed J. G. dissoluta potestate amit-
 tit pater usufructum, habet aduentitia filia pleno jure
 ideoque honestam potest inuenire nubendi conditionem,
 & in partem venire onerum matrimonii. Quum igitur
 illa ratio, cui innititur paternum officium, cesset, etiam
 eorum ridemus miseram diligentiam, qui Germanorum
 cita ex Romanorum legibus, quas tamen iuxta cum igna-
 tissimis intelligunt, explicare consueuerunt & Glosiato-
 rum ineptiis delectantur mirifice. Nos enim flocci fa-
 timus doctorum auctoritatem, siquidem rationibus desti-
 tuti antecedentium gregem sequuntur, & vera a falsis di-
 cernere nesciunt. Nam si euoluas pragmatico-
 rum volumina ad unum omnes ad Latii decreta prouo-
 cant, & ex iis totam de filia locuplere dotanda deciden-
 dam esse questionem adfirmant. Verum enim vero quia
 iam C. 1. horum argumenta sub includem vocauimus, a-
 rum non agimus; sed saltem id notamus, etiam eos, qui
 nobiscum faciunt, incongrue saepe adplicare Romano-
 rum leges ad patria instituta. Quod sicuti simul ex iis quæ
 D. 1. disseruimus facile intelligimus; ita operæ pretium
 videtur Carpzonium denuo vocare in partes, qui hoc mo-
 do respondisse Jctos Lipsienses P. 11 c. 42. d. 13. testatur:
 Ob ihr nun wohl arjet o von euren Schwieger Väter Wittgiff zu
 odern gemeinet, die Eltern auch ihren Vermögen nach die Kin-
 der welche vor sich selbst nichts übriges, noch von ihren
 D 2 eigen-

eigenthümlichen Gütern Wittaißt haben können, aus-
zustatten schuldig sey. &c.

§. VII.

*Sed uti fi-
lia dotata a
successione
excluditur,
etiam locu-
ples dotan-
da.*

Quamvis vero salva sit successio filiabus; tamen
variarum provinciarum statutis receptum, ut filia
accepta dote a reliqua excludatur successione.
MEYER ad Jus Lubec. P. 11. Tit. 2. art. 34. n. 6. COTHM.
CONS. 99. n. 103. Vol. 2. Ex quo itaque facile est ad in-
telligendum, etiam diuites filias esse dotandas a parenti-
bus, liquidem illas ita elocare velint, ut successionis sint
expertes. Eo ipso enim, quod ineunt matrimonia non
amittunt jus succedendi, sed opus, ut eis certa portio dotis
nomine detur, idque expresse Jure Lubecense cautum.
Quæ omnia peculiari opera illustravit MEYER, quatenus
sapius J. R. commentis fuit deceptus & multa a patris mor-
ibus aliena admiscuit, quod jam ab aliis est animaduersum.
Sed antequam nostris meditationibus colophonem impo-
nimus, non in elegantem solvimus quæstionem: an ho-
die etiam, si pater nulla bonorum facta mentione, dixerit,
se in dotem dare filiæ 1000. imperiales, in dubio sit existi-
mandum, eum hanc summam de suis promisisse bonis?
Et putem esse eam adfirmendam, quia promittit se do-
tem daturum. Quam ob rem cautus sit pater, ut bona
filix, de quibus eam dotare velit expressis verbis indicet
BERGER Resolut. Lauterb. p. 538. & Oecon. Jur. L. 1. Tit. 3.
§. 10. not. 3.

§. VIII.

Conclusio.

Plura in præsentiarum non addimus. Tuum igitur
B. L. æquum exspectamus judicium: si vero forte sint qui-
bus contraria arrideat sententia, eos officiose rogamus, ut
argumentis, quæ adduximus, satis faciant. Eorum enim
clamores, qui ideo dissentiant, ut etiam aliquid dixisse
videantur, curamus scilicet.

T A N T U M.

